

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA KAKANJ
Općinsko vijeće**

Broj: 01/1-13-Z/25
Kakanj, 30.12.2025. godine

Z A P I S N I K
sa 13. redovne sjednice Općinskog vijeća održane 30.12.2025. godine (utorak)
u sali Općinskog vijeća sa početkom u 09:00 sati
(sažetak zapisnika)

Predsjedavajući Općinskog vijeća Slaven Katičić je pozdravio prisutne i otvorio 13. redovnu sjednicu Općinskog vijeća.

Predsjedavajući je zamolio da vijećnici i vijećnice prijave svoje prisustvo.

Vijećnici i vijećnice prisutni na sjednici:

Hamza Vahid El-Din, Amel Kusić, Dženan Ajdinović, Tarik Hodžić, Edin Čatić, Ilhana Alajbegović, Sanda Hasagić-Terzić, Ilda Arnautović i Izudin Hrusto (**SDA**)

Mensur Čehajić, Irna Imamović, Senad Softić i Edin Šljivo (**SDP BiH**)

Adnan Demir, Mirnes Pipo i Mensur Bliznović (**NV**)

Branko Češljic (**NS**)

Mirsad Tursum i Fahrudin Buza (**NiP**)

Mirela Kubura (**SN**)

Rešad Merdić (**S BiH**)

Slaven Katičić (**HDZ BiH**)

Mujo Fafulić (**nacionalne manjine**)

Odsutni vijećnici: Mustafa Subašić (**SDA**), Sanel Šabanović, Vinka Aletović i Adem Bečirhodžić (**SDP BiH**), Dževdet Huskić (**NS**), Nermana Mehić (**SN**) i Armin Bašić (**DF**)

Predsjedavajući je konstatovao da je na sjednici u momentu prijave prisutno 23 vijećnika i vijećnica, te su se stekli svi potrebni uslovi za validan rad i odlučivanje Općinskog vijeća.

Pored vijećnika sjednici su prisustvovali:

Mirnes Bajtarević, općinski načelnik

Emir Zaimović, sekretar Općinskog vijeća

Ramiz Hasić, pomoćnik općinskog načelnika za finansije

Mirza Fazlić, pomoćnik općinskog načelnika za privredu, urbanizam i zaštitu okoline

Edin Aliefendić, pomoćnik općinskog načelnika za društvene djelatnosti, boračka pitanja, raseljena lica, izbjeglice i povratnike

Mukades Delibašić, pomoćnik općinskog načelnika za imovinsko-pravne poslove i katastar nekretnina

Bahrudin Arnaut, pomoćnik općinskog načelnika za opću upravu radne i zajedničke poslove, lokalnu samoupravu i mjesne zajednice

Nurudin Hrusto, pomoćnik općinskog načelnika za civilnu zaštitu

Mahir Sikira, šef Stručne službe za poslove općinskog načelnika

Izudin Puščul, direktor Zavoda za planiranje i izgradnju Općine Kakanj

Predstavnici medija

NTV IC Kakanj
Radio Kakanj

Napomene o radu Kolegija Općinskog vijeća

Predsjedavajući je napomenuo da je u pripremi 13. redovne sjednice Općinskog vijeća, Kolegij održao sjednicu dana 22.12.2025. godine i razmatrao pristigle predstavke, prijedloge i inicijative, te je po istima zauzeo stavove i proslijedio ih nadležnim službama i organima na daljnje postupanje.

Usvajanje zapisnika sa 12. redovne sjednice Općinskog vijeća

Nije bilo primjedbi na zapisnik i isti je usvojen jednoglasno sa 23 glasa ZA.

Komentari na dostavljene odgovore na vijećnička pitanja

Nije bilo komentara na dostavljene odgovore na vijećnička pitanja.

Komentari na dostavljena mišljenja na vijećničke inicijative

Nije bilo komentara na dostavljena mišljenja na vijećničke inicijative.

Vijećnička pitanja

Hamza Vahid El-Din: je postavio dva vijećnička pitanja. Prvo pitanje je da li su i u kojoj su mjeri planirana ulaganja u distributivnu mrežu koja napaja naselje Modrinje, Sopotnica i ostale gravitirajuće mjesne zajednice? U odgovoru na ranije postavljeno pitanje je navedeno da se konstantno vrši obilazak i ulaganje u distributivnu mrežu, ali stanovništvo tog područja još uvijek ima isti problem nestanka napajanje električnom energijom prilikom svakih manjih padavina ili vjetera. Zbog toga je zamolio da se poduzmu sve raspoložive mjere da se problem riješi u što kraćem vremenu. Drugo pitanje je koliko puta se Komisija za ekologiju sastala u periodu od svog imenovanja i da li se ista sastajala u vrijeme povećanog zagađenja zraka, te da li su doneseni određeni zaključci/prijedlozi mjera?

Mirnes Pipo: je postavio vijećničko pitanje u kojoj je fazi realizacija Odluke Općinskog vijeća Kakanj od 28.09.2023. godine o uspostavi zaštićenog područja „Gornja Trstionica – Bukovica“? Obzirom da se radi o prostoru od posebnog značaja za zaštitu izvorišta vode koje napaja Kakanj, smatra da je implementacija Odluke vrlo bitna za stanovnike Kaknja. Dodatno je napomenuo da su nedavni ekološki incidenti u općini Vareš, uključujući pomor divljači i trovanje olovom većeg broja lica u blizini deponije rudnika Rupice, pokazatelj koliko je važno preventivno djelovati i osigurati zaštitu tog područja, a samim tim i vodosnabdijevanje Kaknja.

Adnan Demir: je postavio vijećničko pitanje općinskom načelniku zbog sve učestalijih slučajeva vršnjačkog nasilja i tražio pribavljanje zvaničnih informacija od svih osnovnih i srednjih škola na području općine Kakanj i Policijske stanice Kakanj. Podaci koje je tražio su: - koliko je slučajeva vršnjačkog nasilja evidentirano u osnovnim i srednjim školama na području općine Kakanj u posljednje tri godine, pojedinačno po godinama; - koliko je slučajeva prijavljeno Policijskoj stanici Kakanj uz uključivanje Centra za socijalni rad i Doma zdravlja Kakanj; - koliko je slučajeva okončano izricanjem disciplinskih, odgojnih ili drugih zakonom predviđenih mjera; - koliko je Policijska stanica Kakanj u posljednje tri godine provela preventivnih aktivnosti, edukacija i radionica u školama s ciljem prevencije i suzbijanja vršnjačkog nasilja?

Općinski načelnik (odgovor): je rekao da mu nije jasno šta se traži u konkretnom slučaju od općinskog načelnika. Rekao je da je vijećnik Demir pobrojao sve organe i institucije koje su nadležne za predmetnu problematiku, pri čemu općinski načelnik nema nikakvu nadležnost. Rekao je da vijećnik Demir kao izabrani nosilac vlasti može tražiti odgovore od svih nabrojanih organa, jer se postavljeno pitanje ne odnosi na rad organa uprave, odnosno općinskog načelnika.

Irna Imamović: je postavila vijećničko pitanje u vezi novorođene djece tražila da se dostave sljedeći podaci: - ukupan broj djece upisane u matične knjige rođenih Općine Kakanj u 2025. godini; - podaci o broju djece prema mjestu rođenja i to: djeca rođena na području općine Kakanj i djeca rođena u drugim gradovima u BiH, a sa mjestom prebivališta u Kaknju; - posebno iskazan podatak o broju djece rođene van granica BiH, a koja su upisana u matične knjige Općine Kakanj?

Predsjedavajući je konstatovao da je vijećnik Mensur Čehajić postavio vijećničko pitanje bez korištenja govornice.

Mensur Čehajić: je postavio vijećničko pitanje zašto JU „Dom zdravlja sa stacionarom“ Kakanj nije u proteklom periodu bila u mogućnosti pružiti usluge ljekarskog pregleda novoprimljenim radnicima radi zasnivanja radnog odnosa, zbog čega su građani Kaknja bili primorani ljekarski pregled obavljati u drugim domovima zdravlja što im je uzrokovalo dodatne troškove i gubitak vremena? Pitao je da li su razlozi te situacije nedostatak kadra, opreme, organizacioni problemi ili drugi razlozi, te da li su poduzete ili se planiraju poduzeti mjere kako bi se ta usluga u narednom periodu redovno i nesmetano pružala u JU „Dom zdravlja sa stacionarom“ Kakanj?“

Vijećničke inicijative

Hamza Vahid El-Din: je pokrenuo dvije vijećničke inicijative. Prva inicijativa je za postavljanje saobraćajne signalizacije - putokaza na raskrsnici kod mosta za naselje Modrinje. Trenutna saobraćajna signalizacija je nepotpuna i potrebno je postaviti putokaze sa nazivima naselja: Modrinje, Sopotnica, Podgora, Popržena Gora, Jehovina, Bilješevo i Lučani sa adekvatnim smjerovima. Druga inicijativa je za zamjenu vodovodnih azbestno-betonskih cijevi u ulici 4. juli. Naime, u toj ulici se još uvijek koriste vodovodne azbestno-betonske cijevi koje su štetne su po zdravlje stanovništva, pa je stoga potrebno izvršiti zamjenu istih sa cijevima koje su higijenski i zdravstveno prihvatljive.

Mensur Bliznović: je pokrenuo vijećničku inicijativu za proširenje i uređenje parking prostora između zgrada „Sunce 1“ i Elektrodistribucije Kakanj. Na navedenoj lokaciji evidentan je dugogodišnji problem nedostatka parking prostora, neuređenog prostora i neadekvatnog rješenja za odlaganje otpada, što direktno utiče na kvalitet života stanovnika tog dijela grada. Predložio je da Općina Kakanj pokrene aktivnosti koje bi obuhvatale proširenje postojećeg parking prostora s ciljem povećanja broja parking mjesta, asfaltiranje navedene površine i izgradnju podzemnog kontejnera za odlaganje otpada čime bi se oslobodio dodatni prostor za parkiranje vozila.

Irna Imamović: je pokrenula dvije vijećničke inicijative. Prva inicijativa je da Zavod za planiranje i izgradnju općine Kakanj, u saradnji sa nadležnim institucijama i relevantnim organizacijama, pristupi sistemskom rješavanju problema pasa lualica kako bi se istovremeno osigurala sigurnost građana na ulicama grada i humano zbrinjavanje pasa u adekvatnim skloništima. Razlog za inicijativu je što sve veći broj građana Kaknja svakodnevno ukazuje na problem izraženog prisustva pasa lualica na javnim površinama. Problem je nažalost prerastao u jedno od značajnijih pitanja sigurnosti i kvaliteta života u lokalnoj zajednici. Druga inicijativa se odnosi na svakodnevno prisustvo policijske patrole tokom januara, za vrijeme školskog raspusta u vikend naselju Ponijeri, zbog nepropisnog parkiranja i prekoračenja dozvoljene brzine kretanja vozila. Tokom januara, u periodu trajanja školskog raspusta, kao i u vrijeme povećanog broja posjetilaca u vikend naselju Ponijeri, kontinuirano se evidentiraju poteškoće u odvijanju saobraćaja. Navedeno stanje dovodi do povećanog rizika po sigurnost svih učesnika u saobraćaju, a naročito pješaka i djece.

Mensur Čehajić: je pokrenuo vijećničku inicijativu ispred kluba vijećnika SDP-a da se u budžetu JU „Kulturno-sportski centar“ Kakanj za 2026. godinu planiraju sredstva u iznosu od 30.000 KM za obilježavanje Nove 2027. godine na otvorenom. Proslava Nove godine bi bila namijenjena svim generacijama uz prigodan kulturno-zabavni i muzički program u skladu sa raspoloživim finansijskim sredstvima i važećim propisima.

Predsjedavajući je konstatovao da su vijećnici Senad Softić i Mirela Kubura podnijeli vijećničke inicijative bez govornice.

Senad Softić: je pokrenuo dvije vijećničke inicijative. Prva je za planiranje subvencioniranja ugradnje solarnih panela fizičkim licima – građanima za vlastite potrebe. Realizacijom inicijative bi se građanima olakšao prelazak na ekološki prihvatljivije izvore energije što je u svakom slučaju važno kako za zaštitu

okoliša tako i za poticaj samoodrživih domaćinstava. Uvođenjem predmetnog projekta subvencioniranja Općina bi aktivno doprinijela zaštiti okoliša i smanjenju emisija štetnih gasova, te uskladila lokalne politike sa savremenim evropskim standardima u oblasti obnovljivih izvora energije. Druga inicijativa se odnosi na planiranje sredstava u programima za 2026. godinu za vodosnabdijevanje naselja u MZ Slapnica (Slapnica i Slapna Gora). Mještani MZ Slapnica se već duži niz godina suočavaju sa problemom nedostatka stabilnog vodosnabdijevanja. Prema raspoloživim podacima više od 70% domaćinstava nije priključeno na vodovod. Idejni i glavni projekti kao i revizija su završeni 2013. godine, preostalo je samo izdavanje urbanističke saglasnosti, čime bi se stekli svi formalni preduslovi da se projekt započne. Predložio je da se sredstva za realizaciju projekta obezbijede od prihoda ostvarenih u skladu sa Zakonom o izdvajanju i usmjeravanju dijela prihoda preduzeća ostvarenih radom termoelektrana.

Mirela Kubura: je pokrenula vijećničku inicijativu za planiranje rekonstrukcije i unapređenja cestovnog pravca Kakanj – Zavidovići (preko Kamenice) s ciljem uspostavljanja kvalitetne i funkcionalne saobraćajne veze između Kakanja i Zavidovića. Cestovni pravac je od strateškog značaja za stanovništvo i privredu i imao bi poseban značaj za razvoj lokalne i regionalne privrede, razvoj poljoprivrede i turizma, povezivanje i ravnomjerniji razvoj ruralnih područja. Smatra opravdanim da Ministarstvo za prostorno uređenje, promet i komunikacije i zaštitu okoline ZDK i Kantonalna direkcija za ceste razmotre mogućnost uvrštavanja tog cestovnog pravca u planske i strateške dokumente, izradu studije izvodljivosti i potrebne projektno-tehničke dokumentacije u okviru raspoloživih budžetskih sredstava, te da se Općinskom vijeću Kakanj dostavi informacija o statusu, mogućnostima i narednim koracima u vezi s realizacijom cestovnog povezivanja Kakanj – Zavidovići preko Kamenice.

Utvrđivanje dnevnog reda

Predsjedavajući je za 13. redovnu sjednicu predložio dnevni red po pozivu, a koji je usaglašen na sjednici Kolegija, te je napomenuo je da je Komisija za izbor u regulirane organe kao predlagač povukla tačku 17 predloženog dnevnog reda „*Prijedlog rješenja o konačnom imenovanju za člana Skupštine JP „Vodokom“ d.o.o. Kakanj*“, pa bi Vijeće raspravljalo o 20 tačaka dnevnog reda.

Nije bilo diskusije o dnevnom redu i isti je usvojen jednoglasno sa 23 glasa ZA.

Usvojeni dnevni red

1. Prijedlog okvirnog programa rada Općinskog vijeća za 2026. godinu
2. Prijedlog odluke o izmjenama i dopunama Budžeta Općine Kakanj za 2025. godinu
3. Prijedlog budžeta Općine Kakanj za 2026. godinu
4. Prijedlog odluke o izvršavanju budžeta Općine Kakanj za 2026. godinu
5. Prijedlog odluke o prestanku važenja Odluke o općinskim taksama na istaknutu firmu
6. Nacrt odluke o komunalnim taksama
7. Prijedlog odluke o izmjeni i dopuni Tarifnika o visini naknade za korištenje javnih površina
8. Prijedlog odluke o organizaciji i načinu naprate parkiranja na javnim parking prostorima na području općine Kakanj
9. Prijedlog odluke o plaćama i naknadama u organima Općine Kakanj
10. Prijedlog odluke o izmjenama i dopunama Odluke o administrativnim taksama Općine Kakanj
11. Prijedlog odluke o vrijednosti boda komunalne naknade u 2026. godini
12. Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kakanju
13. Prijedlog odluke o gubljenju statusa javnog dobra
14. Prijedlog odluke o davanju na privremeno korištenje poslovnog prostora bez naknade
15. Prijedlog odluke o sufinansiranju troškova prevoza redovnih učenika srednjih škola za 2026. godinu
16. Prijedlog odluke o imenovanju člana OIK-a
17. Prijedlog rješenja o konačnom imenovanju člana Skupštine JP „Grijanje“ d.o.o. Kakanj
18. Prijedlog rješenja o konačnom imenovanju Upravnog odbora JU „Dom zdravlja sa stacionarom“ Kakanj
19. Prijedlog rješenja o konačnom imenovanju Upravnog odbora JU za predškolski odgoj i obrazovanje „Mladost“ Kakanj
20. Prijedlog rješenja o imenovanju Ekspertnog tima iz oblasti zaštite okoline

1. Tačka

Prijedlog okvirnog programa rada Općinskog vijeća za 2026. godinu

Predlagač: Kolegij Općinskog vijeća

Obrađivač: Stručna služba za poslove Općinskog vijeća

Izjavitelj: Slaven Katičić, predsjedavajući Općinskog vijeća

U diskusiji niko nije učestvovao i Vijeće je jednoglasno sa 22 glasa ZA usvojilo Okvirni programa rada Općinskog vijeća za 2026. godinu.

2. Tačka

Prijedlog odluke o izmjenama i dopunama Budžeta Općine Kakanj za 2025. godinu

Predlagač: Općinski načelnik

Obrađivač: Služba za finansije

Izjavitelj: Ramiz Hasić, pomoćnik općinskog načelnika

Ramiz Hasić: je rekao da su se naknadno, nakon dostavljanja materijala, desili i prilivi sa viših nivoa vlasti i međunarodnih organizacija pa se povećavaju prihodi od poreza na dohodak fizičkih lica na 3.802.589,41 KM, uvodi se nova stavka po osnovu potpisanog ugovora sa UNDP 20.292,00 KM. Primljen je transfer od Ministarstva za privredu Zeničko-dobojskog kantona za subvencioniranje dijela troškova organizacije manifestacija u iznosu od 6.619,29 KM. Na rashodovnoj strani: Izdaci za poreze i doprinose za naknade vijećnicima u OV i za naknade za stalna i povremena radna tijela OV-a, sredstva za poreze i doprinose za naknade OIK-u i na naknade biračkim odborima glase 45.500,00 KM. Uklanjanje bespravno postavljenih predmeta i provođenje drugih mjera po nalogu općinske inspekcije glase 7.000,00 KM. Kôd 613900 „Izgradnja i uređenje dječijeg igrališta sa pratećim sadržajem na izletištu Ponijeri“ (sredstva Ministarstva za privredu ZDK), postaje kôd 821000. U Službi za finansije pozicija – „Regres“ iznosi: 8.510,00 KM; pozicija „Materijal za opravku i održavanje JU za predškolski odgoj i obrazovanje „Mladost“ Kakanj“ iznosi 32.000,00 KM, a za isti iznos se umanjuje pozicija „Usluge opravke i održavanja“ na 24.815,31 KM. U Službi za opću upravu, radne i zajedničke poslove, lokalnu samoupravu i mjesne zajednice pozicija „Posebna naknada na dohodak za zaštitu od prirodnih i drugih nesreća“ iznosi 3.700,00 KM. U Službi civilne zaštite pozicija „Izdaci za sitan inventar iz Programa utroška sredstava od naknada za zaštitu od požara“ (722432, 722583 i 722584) mijenja se iznos od 10.000,00 KM na 2.000,00 KM. Ta sredstva se prebacuju na Program utroška sredstava od naknada za zaštitu od požara (722432, 722583 i 722584) koji će iznositi ukupno 43.000,00 KM. Formirana je i nova pozicija, a u skladu sa sredstvima UNDP-a, „Transfer Zavodu za planiranje i izgradnju za realizaciju projekta sa UNDP-om“, prema Ugovoru broj: 02/1-7988/25 u iznosu od 86.240,70 KM.

U diskusiji niko nije učestvovao i Vijeće je jednoglasno sa 22 glasa ZA usvojilo Odluku o izmjenama i dopunama Budžeta Općine Kakanj za 2025. godinu.

Vijeće je vodilo objedinjenu raspravu po tačkama 3. i 4. dnevnog reda.

3. Tačka

Prijedlog budžeta Općine Kakanj za 2026. godinu

4. Tačka

Prijedlog odluke o izvršavanju budžeta Općine Kakanj za 2026. godinu

Predlagač: Općinski načelnik

Obrađivač: Služba za finansije

Izjavitelj: Ramiz Hasić, pomoćnik općinskog načelnika

Ramiz Hasić: je rekao da se zbog nemogućnosti Federalnog ministarstva prometa i komunikacija da do kraja godine prenese sredstva za realizaciju projekta „Rekonstrukcija dionice ceste od naselja Zgošća do naselja Tršće“, Budžet za 2026. godinu će biti uvećan za iznos od 322.392,73 KM.

U diskusiji su učestvovali Irna Imamović, Rešad Merdić, Hamza Vahid El-Din i Adnan Demir.

Irna Imamović: je rekla da Budžet za 2026. godinu nije razvojnog karaktera i da je iznos za kapitalne investicije dosta nizak. Osvrnula se na stavke: subvencioniranje boravka djece u predškolskim ustanovama na području općine Kakanj, sufinansiranje troškova medicinski pomognute oplodnje, dažke

stipendije iz Budžeta Općine i studentske stipendije iz Budžeta Općine i rekla da su trebale ostati na istom nivou, bez obzira na smanjen broj korisnika ovih pogodnosti, odnosno da se iznos pojedinačne stipendije trebao povećati, obzirom na tešku ekonomsku situaciju roditelja i značaj djece za cjelokupno društvo.

Rešad Merdić: se složio sa prethodnim izlaganjem vijećnice Imamović i dodao da je Budžet uglavnom planiran prema potrebama organa uprave i javnih ustanova, a da je vrlo malo prostora ostalo za kapitalna ulaganja. Upitao je za šta su namijenjena sredstva opredijeljena za izgradnju hitne medicinske pomoći jer iznos je dovoljan samo za projektnu dokumentaciju. U vezi stipendija rekao je da se ne slaže da se ova sredstva umanjuju, a Turistička zajednica je samo trošak jer nema nikakvih prihoda niti razvojnih projekata. Također, dodao je da nije planirano rješavanje pasa lualica, kao i da se kapitalni projekti samo prenose iz godine u godinu, što znači da nema ni novih investicija.

Hamza Vahid El-Din: je rekao da je Budžet i razvojni i socijalni jer se značajna sredstva izdvajaju i u ove oblasti, kao i da se postupa vrlo odgovorno i pažljivo sa sredstvima, a najvažnije od svega je da je on provodiv. Na kraju je čestitao općinskom načelniku i pomoćniku Hasiću na dobrom planiranju i poštivanju rokova za usvajanje Budžeta.

Adnan Demir: je ispred kluba vijećnika Novo vrijeme upitao o razlici povećanja izdataka za plaće u odnosu na Nacrt budžeta (u Nacrtu je bilo predviđeno 26%, a u Prijedlogu 16%) i dodao da je Budžet za 2026. godinu rastrošan i da nema kapitalnih ulaganja kao što su izgradnja hitne medicinske pomoći i izgradnja gradske tržnice. Napomenuo je da je ovaj Klub predložio nekoliko amandmana u toku javne rasprave: subvencioniranje rada dežurne apoteke, pomoć u liječenju onkoloških pacijenata, subvencije za prelazak na ekološki prihvatljiva goriva u domaćinstvima, te značajnije ulaganje u zdravstvo.

Ramiz Hasić: što se tiče prijedloga vijećnice Imamović rekao je da će se, ukoliko se ukaže potreba za većim sredstvima za finansiranje više đaka i studenata ili subvencije troškova za predškolski odgoj, u nekom od narednih rebalansa Budžeta ove stavke i povećavati. U vezi komentara za plaće u javnim ustanovama rekao je da su uprave javnih ustanova dogovorile da koeficijenti i osnovice budu iste ili približno iste u svim javnim ustanovama i da su dosadašnje niske plaće dovedene u neki razuman iznos. U vezi plaća u organu uprave, rekao je da je Vlada F BiH donijela odluku o povećanju osnovice što je Budžet i pratio. Zahvalio se vijećniku El-Dinu, a vijećniku Demiru je rekao da je istina da je u Nacrtu bilo veće povećanje, ali zbog različitih uporednih parametara i naknadnih rebalansa Budžeta.

Nakon diskusije Vijeće je usvojilo Budžet Općine Kakanj za 2026. godinu, sa 18 glasova ZA, 3 glasa PROTIV i 2 glasa UZDRŽAN. Također, Vijeće je usvojilo Odluku o izvršavanju Budžeta Općine Kakanj za 2026. godinu, sa 18 glasova ZA, bez glasova PROTIV i 5 glasova UZDRŽAN.

5. Tačka

Prijedlog odluke o prestanku važenja Odluke o općinskim taksama na istaknutu firmu

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o prestanku važenja Odluke o općinskim taksama na istaknutu firmu.

6. Tačka

Nacrt odluke o komunalnim taksama

Predlagač: Općinski načelnik

Obrađivač: Radna grupa za izradu odluke o komunalnim taksama

Izjavitelj: Fadil Merdić, predsjednik Radne grupe

U diskusiji su učestvovali: Hamza Vahid El-Din, Rešad Merdić, Adnan Demir i Mirnes Pipo.

Hamza Vahid El-Din: je istakao značaj donošenja ovakve odluke za društvo u cjelini i dodao da ima prostora za poboljšanje te da će klub vijećnika SDA u roku predviđenom za javnu raspravu dostaviti svoje amandmane na predmetni Nacrt odluke.

Rešad Merdić: je upitao da li je Nacrt odluke u skladu za pozitivnim zakonskim propisima kako ne bi opet došlo do situacije kao sa Odlukom o općinskim taksama na istaknutu firmu.

Adnan Demir: je podržao donošenje ove odluke i predložio da uzor bude Grad Bihać naročito u dijelu tarifnika koji tretira kladionice i igre na sreću (za slot mašine 2.000-5.000 KM, a za korištenje poslovnih prostora gdje se priređuju igre na sreću od 15.000-20.000 KM).

Mirnes Pipo: se složio sa prijedlozima prethodnika i upitao na osnovu kojih zakonskih regulativa je oporezovan prstor za proizvodnju cementa.

Fadil Merdić (odgovor): se zahvalio vijećnicima na diskusiji i vijećniku Merdiću odgovorio da je u Radnoj grupi bilo pet pravnik a te da je u sve bio uključen i općinski pravobranilac. U vezi prijedloga da se ide po uzoru Grada Bihaća, rekao je da treba razmisliti o tome šta je cilj ovog prijedloga, da li da oni odu sa područja općine ili da nastave sa radom.

Nakon diskusije Vijeće je jednoglasno sa 23 glasa ZA usvojilo Zaključak o utvrđivanju Nacrta odluke o komunalnim taksama, sa rokom javne raprave u trajanju od 15 dana u periodu od 05.01-19.01.2026. godine.

7. Tačka

Prijedlog odluke o izmjeni i dopuni Tarifnika o visini naknade za korištenje javnih površina

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji niko nije učestvovao i Vijeće je jednoglasno sa 22 glasa ZA usvojilo Odluku o izmjeni i dopuni Tarifnika o visini naknade za korištenje javnih površina.

Usljedila je pauza u radu Vijeća od 15 minuta na prijedlog kluba NV.

8. Tačka

Prijedlog odluke o organizaciji i načinu naprate parkiranja na javnim parking prostorima na području općine Kakanj

Predlagač: Općinski načelnik

Obrađivač: Služba za privredu, urbanizam i zaštitu okoline

Izjavitelj: Mirza Fazlić, pomoćnik općinskog načelnika

U diskusiji je učestvovao Hamza Vahid El-Din.

Hamza Vahid El-Din: je rekao da su svi amandmani sa prošle sjednice uvršteni u Prijedlog odluke i predložio da se stav 2, člana 14. Odluke briše.

Mirza Fazlić: je rekao da je dva mjeseca bilo dovoljno da se prijedlozi dostave, te da traži da se Vijeće o Prijedlogu odluke izjasni.

Usljedila je pauza u radu Vijeća od 5 minuta na prijedlog općinskog načelnika.

Nakon pauze riječ je dobio Mirza Fazlić

Mirza Fazlić: je pozvao vijećnike da Odluku usvoje kako je i predložena od strane predlagača i obrađivača. Dodao je da je Prijedlog odluke izradila Komisija po prijedlozima sa sjednice, te da u ovoj fazi eventualnih izmjena jedino bi Komisija bila ovlaštena prihvatati amandmane. Kako se ne bi gubilo vrijeme, a kako je predmet odluke živa materija, kroz njenu implementaciju će se koristiti instrumenti da se Odluka nakon izvjesnog vremena mijenja i prilagođava.

Nakon pauze Vijeće je usvojilo Odluku o organizaciji i načinu naprate parkiranja na javnim parking prostorima na području općine Kakanj, sa 18 glasova ZA, bez glasova PROTIV i 4 glasa UZDRŽAN.

9. Tačka

Prijedlog odluke o plaćama i naknadama u organima Općine Kakanj

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji niko nije učestvovao i Vijeće je usvojilo Odluku o plaćama i naknadama u organima Općine Kakanj, sa 18 glasova ZA, bez glasova PROTIV i 5 glasova UZDRŽAN.

10. Tačka

Prijedlog odluke o izmjenama i dopunama Odluke o administrativnim taksama Općine Kakanj

Predlagač: Komisija za izbor u regulirane organe

Obrađivač: Stručna služba za poslove Općinskog vijeća

Izjavitelj: Irna Imamović, predsjednica Komisije

Predlagač: Općinski načelnik

Obrađivač: Služba za opću upravu, radne i zajedničke poslove, lokalnu samoupravu i mjesne zajednice

Izjavitelj: Bahrudin Arnaut, pomoćnik općinskog načelnika

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o izmjenama i dopunama Odluke o administrativnim taksama Općine Kakanj.

11. Tačka

Prijedlog odluke o vrijednosti boda komunalne naknade u 2026. godini

Predlagač: Općinski načelnik

Obrađivač: Zavod za planiranje i izgradnju općine Kakanj

Izjavitelj: Izudin Puščul, direktor Zavoda

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o vrijednosti boda komunalne naknade u 2026. godini.

12. Tačka

Prijedlog odluke o načinu i uslovima raspolaganja nekretninom – prodaji neposrednom pogodbom građevinskog zemljišta u Kakanju

Predlagač: Općinski načelnik

Obrađivač: Služba za imovinsko-pravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji niko nije učestvovao i Vijeće je usvojilo Odluku o načinu i uslovima raspolaganja nekretninom – prodaji neposrednom pogodbom građevinskog zemljišta u Kakanju, sa 20 glasova ZA, 3 glasa PROTIV, bez glasova UZDRŽAN.

13. Tačka

Prijedlog odluke o gubljenju statusa javnog dobra

Predlagač: Općinski načelnik

Obrađivač: Služba za imovinsko-pravne, geodetske poslove i katastar nekretnina

Izjavitelj: Mukades Delibašić, pomoćnik općinskog načelnika

U diskusiji niko nije učestvovao i Vijeće je usvojilo Odluku o gubljenju statusa javnog dobra, sa 20 glasova ZA, bez glasova PROTIV i 3 glasa UZDRŽAN.

14. Tačka

Prijedlog odluke o davanju na privremeno korištenje poslovnog prostora bez naknade

Predlagač: Općinski načelnik

Obrađivač: Služba za imovinsko-pravne, geodetske poslove i katastar nekretnina

Izjestilac: Mukades Delibašić, pomoćnik općinskog načelnika

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o davanju na privremeno korištenje poslovnog prostora bez naknade, Udruženju građana pčelara „Bagrem“ Kakanj.

15. Tačka

Prijedlog odluke o sufinansiranju troškova prevoza redovnih učenika srednjih škola za 2026. godinu

Predlagač: Općinski načelnik

Obrađivač: Služba za društvene djelatnosti, boračka pitanja, raseljena lica, izbjeglice i povratnike

Izjestilac: Edin Aliefendić, pomoćnik općinskog načelnika

U diskusiji niko nije učestvovao i Vijeće je jednoglasno sa 23 glasa ZA usvojilo Odluku o sufinansiranju troškova prevoza redovnih učenika srednjih škola za 2026. godinu.

16. Tačka

Prijedlog odluke o imenovanju člana OIK-a

Predlagač: Komisija za izbor člana OIK-a

Obrađivač: Stručna služba za poslove Općinskog vijeća

Izjestilac: Slaven Katičić, član Komisije

Slaven Katičić: je rekao da je Komisija provela konkursnu proceduru u skladu sa zakonskim propisima i da predlaže Vijeću da se za člana Općinske izborne komisije imenuje Maja Benić.

U diskusiji niko nije učestvovao i Vijeće je usvojilo Odluku o imenovanju Maje Benić za člana OIK-a, sa 18 glasova ZA, bez glasova PROTIV i 5 glasova UZDRŽAN.

17. Tačka

Prijedlog rješenja o konačnom imenovanju člana Skupštine JP „Grijanje“ d.o.o. Kakanj

Predlagač: Komisija za izbor u regulirane organe

Obrađivač: Stručna služba za poslove Općinskog vijeća

Izjestilac: Irna Imamović, predsjednica Komisije

Irna Imamović: je kazala da je Komisija provela konkursnu proceduru u skladu sa zakonskim propisima i da predlaže Vijeću da se za člana Skupštine Javnog preduzeća „Grijanje“ d.o.o. Kakanj imenuje Mirnes Merdić.

U diskusiji niko nije učestvovao i Vijeće je usvojilo Rješenje o imenovanju Mirnesa Merdića za člana Skupštine JP „Grijanje“ d.o.o. Kakanj, sa 18 glasova ZA, bez glasova PROTIV i 5 glasova UZDRŽAN.

18. Tačka

Prijedlog rješenja o konačnom imenovanju Upravnog odbora JU „Dom zdravlja sa stacionarom“ Kakanj

Predlagač: Komisija za izbor UO JU „Dom zdravlja sa stacionarom“ Kakanj

Obrađivač: Stručna služba za poslove Općinskog načelnika

Izjestilac: Emir Zaimović, predsjednik Komisije

Emir Zaimović: je rekao da je Komisija provela konkursnu proceduru u skladu sa zakonskim propisima za imenovanje dva člana Upravnog odbora i napomenuo da još uvijek nije došao prijedlog za imenovanje člana ispred Ministarstva zdravstva ZDK, te je predložio da se u Upravni odbor Javne ustanove „Dom zdravlja sa stacionarom“ Kakanj, imenuju Magbula Ganić – predsjednik, iz reda stručnih radnika Ustanove i Ahmed Begić – član, ispred osnivača.

U diskusiji niko nije učestvovao i Vijeće je usvojilo Rješenje o imenovanju UO JU „Dom zdravlja sa stacionarom“ Kakanj i to: Magbula Ganić, predsjednica – ispred stručnih radnika Ustanove i Ahmed Begića, član – ispred Osnivača, sa 18 glasova ZA, bez glasova PROTIV i 4 glasa UZDRŽAN.

19. Tačka

Prijedlog rješenja o konačnom imenovanju Upravnog odbora JU za predškolski odgoj i obrazovanje „Mladost“ Kakanj

Predlagač: Komisija za izbor UO JU za predškolski odgoj i obrazovanje „Mladost“ Kakanj

Obrađivač: Stručna služba za poslove Općinskog vijeća

Izviestilac: Sanda Hasagić-Terzić, predsjednica Komisije

Sanda Hasagić-Terzić: je rekla da je Komisija provela konkursnu proceduru u skladu sa zakonskim propisima i da predlože da se u Upravni odbor Javne ustanove za predškolski odgoj i obrazovanje „Mladost“ Kakanj, imenuju Sabina Vehab – predsjednica, ispred Osnivača, Sonja Jerkić – član ispred Vijeća roditelja i Aida Hasagić – član, ispred stručnih radnika Ustanove.

U diskusiji nije niko učestvovao i Vijeće je usvojilo Rješenje o konačnom imenovanju Upravnog odbora JU za predškolski odgoj i obrazovanje „Mladost“ Kakanj i to: Sabina Vehab, predsjednica – ispred Osnivača, Sonja Jerkić, član – ispred Vijeća roditelja i Aida Hasagić, član – ispred stručnih radnika Ustanove, sa 17 glasova ZA, bez glasova PROTIV i 5 glasova UZDRŽAN.

20. Tačka

Prijedlog rješenja o imenovanju Ekspertnog tima iz oblasti zaštite okoline

Predlagač: Komisija za izbor i imenovanje

Obrađivač: Stručna služba za poslove Općinskog vijeća

Izviestilac: Hamza Vahid El-Din, predsjednik Komisije

Hamza Vahid El-Din: je rekao da se Ekspertni tim imenuje u skladu sa Zaključkom Općinskog vijeća sa prethodne sjednice, te je predložio tim u sljedećem sastavu: Azrudin Husika – predsjednik, Senad Bajrić, Saida Berbić, Dženan Ajdinović i Sanel Škulj – članovi.

U diskusiji nije niko učestvovao i Vijeće je usvojilo Rješenje o imenovanju Ekspertnog tima iz oblasti zaštite okoline u sastavu: Azrudin Husika – predsjednik, Senad Bajrić, Saida Berbić, Dženan Ajdinović i Sanel Škulj – članovi, sa 19 glasova ZA, bez glasova PROTIV i 4 glasa UZDRŽAN.

Predsjedavajući je zaključio rad 13. redovne sjednice Općinskog vijeća u 11:30 h.

Audiozapis sa sjednice Vijeća pohranjen je u elektronskoj formi (CD-u) i sastavni je dio ovog Zapisnika.

**SEKRETAR
OPĆINSKOG VIJEĆA**
Emir Zaimović

**PREDSJEDAVALAČI
OPĆINSKOG VIJEĆA**
Slaven Katičić